

忻州志卷二十七

文苑

魏

梁越字元覽新興人也少而好學博綜經傳無所不通性純和篤信行無擇善國初爲禮經博士太祖以其謹厚舉動可則遷上大夫命授諸皇子經書太宗卽祚以師傅恩賜爵祝阿侯後出爲雁門太守獲白雀以獻拜光祿大夫卒子弼早卒弼子恭襲降爲雲中子

金

忻州志

卷二十七

文苑

一

王甫字用之秀容人通經史純質有儒行亦以知醫見稱妻死不更娶二子俱無家室并曰之事率親爲之貧居陋巷中破屋蕭然不蔽風雨而弦誦之聲不絕也聞北兵入塞度州不可守去之太原貞祐二年病歿子萬石字器玉住太學有賦聲次萬鍾

王萬鍾字元卿少有逸才讀書有後先不欲速成詩文閒適似其爲人客至清談終日人不敢以俗事浼之與同郡田德秀齊名號王田評者謂規製宏博王不及田而瀟灑無塵土氣田亦非王比也古詩尤蕭散有自得之趣父歿後與兄居於平晉之金城里明年

兵復至兄被害萬鍾欲收葬之時游騎充斥親舊勸勿往萬鍾持不可曰兄死不收留此身欲何用耶流涕而去尋亦被禍時人甚哀惜之死時年二十七折安上亦秀容人從南峯先生修武呂豫學元遺山推爲一時名士又纂毅字威卿其先東海人祖待制某知忻州因家焉與遺山善有挽辭載藝文

元好問字裕之太原秀容人德明子七歲能詩年十四從郝天挺游不事舉業淹貫諸子百家六年業成下太行渡大河爲箕山琴臺詩趙秉文一見謂近代無此作也於是名震京師登興定五年進士第歷內鄉

南陽令天興初由尚書省掾除左司都事轉行省左司員外郎入翰林知制誥金亡不仕爲文備衆體詩奇崛而絕雕績五言高古沈鬱七言樂府不用古題特出新意慷慨歌謠挾幽并之氣長短句抑揚新聲以抒哀怨兵後故老皆盡蔚爲宗工晚年尤以著作自任嘗欲修金史未果因構野史亭著述其上採摭舊聞得百餘萬言所傳有中州集壬辰雜編後修金史多本焉卒年六十八詩文著作若干卷皆刊行於世本傳墓誌載入藝文兄好古字敏之好謙字益之皆知名好古墓誌載藝文

國朝

楊克茂字松若忻州人宏儒子康熙癸巳 恩科舉人  
乙未成進士官翰林院編修孝行純篤博學宏通潛  
心理學入詞林多著作有經濟才藝苑諸公咸欽服  
因丁母艱哀毀成疾事業未就而卒士林惜之

崔爍字雲峯景曾長子弱冠領雍正乙卯科鄉薦乾隆  
丁巳 恩科成進士戊辰選河南淇縣知縣縣當九  
省孔道疲於供億爍悉因舊例事辦而民不擾辛未  
調虞城虞多盜有劇賊爲民害悉捕之置諸法厯署  
夏邑考城縣事所至有聲陞鄭州知州以俸淺格於

忻州志

卷二十七

文苑

三

吏議甲戌行取授大理寺右評事丁丑京察一等記  
名以御史用厯禮部儀制司主事本司員外郎兼鑄  
印局掌印充癸未科會試提調爍在司於刑部稿不  
愜者必駁之多所平反官禮部六年時有建白皆關  
體要甲申題陞本司郎中未引 見因公鑄職念父  
老遂歸不復出爍少以文名旣成進士需次在籍益  
博綜羣書於制藝尤深理法精密一字不貸壬申癸  
酉兩充河南鄉試同考官稱得人旣歸州牧勅設書  
院延主講席執經之士彬彬一時年六十九卒學者  
稱乙軒先生所撰有稽古堂四書講義百餘萬言又

訂古文別錄五冊唐宋文讀本四冊史文八冊制藝  
讀本四冊鈔訂昌黎詩集手批左傳皆藏於家牒次  
子映辰亦以文章鳴於時學者稱西山先生其門人  
孔傳性字舟山生而穎異年十四補博士弟子赴省  
試口占云太原古道無人掃一夜西風萬里清爲人  
傳誦映辰父子操人倫鑒一見大加詫賞羅致門下  
指授先正文法盡得其傳由是文名大噪乾隆己酉  
拔貢乙卯領鄉薦嘉慶辛酉成進士授內閣中書以  
親老不仕歸設帳祁縣四十餘年南至平蒲北及代  
朔負笈從游者數百人一經問業獲登甲科者數十

人嘗云近時空疏爲文但習揣摩諧聲調經史載籍  
多束置高閣故言中無物宜先講求經義以植根柢  
遠近翕然宗之皆務實學又云時文小道爲取科名  
儒者自有真修所當切究又云天文樂律禹貢水道  
諸書久失其傳爲撮其精要以教學者有倚雲堂文  
集刊行於世

馬潛蛟字孔昭騰蛟弟性行謹飭不諧世務乾隆癸酉  
舉於鄉年甫二十益潛心博覽公車屢上輒報罷甲  
午選太原縣教諭公餘讀書作文不少輟甲辰始成  
進士授工部虞衡司主事未幾告歸教授里中四方

學者曰進善草書得者寶之嘉慶癸酉重宴鹿鳴又  
二年無疾卒年八十二著有容光餘草

郝師伊字慕川忻之董村人自少讀書卽不拘拘帖括  
習泛覽載籍皆能通其要領然屢不得志於有司以  
才畧自負欲以功名見於世會黔楚苗事起福文襄  
公督師進剿師伊聞之喜曰男兒當爲 國殺賊效  
命疆場豈能老死牖下而無聞乎因爲書論平苗事  
意在羈縻銜勒不必專畏以威書成苗疆底定未果  
上生平肆力文章俱有義法竟鬱鬱以終同里有楊  
文炳字虎變年齒稍後於師伊事繼母以孝聞年二

十二以冠軍補博士弟子員教授生徒因才陶鑄嘗  
曰德行本也文藝末也舍本逐末雖拾青紫何取焉  
手輯儒先嘉言懿行以教學者以是從游者日益衆  
人望而知爲文炳弟子也爲文恆不自收拾故流傳  
絕少別有傳詳其事其門人之最著者石皓字仞山  
杜長生字立齋皆偃蹇僅獲一第以終皓尤富於文  
凡里人之碑誌傳序多出其手惜無子散軼無存長  
生有立齋詩文遺稿一冊二人皆以文行爲後學之  
師 時又有李滋字樹村臧宗魯字裔東徐存愚字  
拙 三人相友善李臧時以狂士目之然皆不永年

存愚與洪洞王雪堂椅交最密以詩文相期許椅厲居忻州年餘爲訪師伊宗魯而來皆已先歿至今忻之能文者多經石杜指授因總數人大畧而爲之傳以見淵源有白云爾

銀錫齡原名鵬林以避遠祖諱改字夢徵忻州人姿敏異讀書纔成誦卽終身不忘經史百家皆能搜抉其奧交手鈔前人詩文集排比成帙副載巾箱性癖陶詩著有椿園詩集又輯有左聯二十卷前輩崔乙軒稱其組織自然三十喪偶不再娶或以爲言笑曰欲妻梁鴻當待孟光耳屢薦秋闈不售設館授徒成就

忻州志

卷二十七

文苑

六

多人一時推爲老宿云

焦以甯字亞清忻州人廩生績學能文與同郡王毓桐薛河東齊名以甯才尤高獨不遇卒著有芸圃文稿子丙鱗世其學道光庚子舉人爲人孝友純赤好恢諧一座傾倒家無儋石之儲豁如也父子並爲士林所推